

«28» սեպտեմբերի 2020թ.

ք. Երևան

ՀՀ պետական եկամուտների կոմիտեի իրավաբանական վարչության պետ Արման Մնացականյանս, քննելով Անդրանիկ Սվարյանի վերաբերյալ նյութերը.

**Պ Ա Ր Զ Ե Ց Ի՝**

2020թ. օգոստոսի 2-ին ՀՀ ՊԵԿ Արևելյան մաքսատուն-վարչության Բագրատաշենի մաքսային կետ բաժնում գննման է ենթարկվել ՀՀ ժամանած Անդրանիկ Սվարյանի կողմից վարվող RENAULT մակնիշի 545AP61 պետհամարանիշի բեռնատարը, ինչի արդյունքում բեռնատարի սրահի տեսազննությամբ հայտնաբերվել է 4 հատ IPHONE մոդելների բջջային հեռախոս:

Փաստի առթիվ Անդրանիկ Սվարյանի նկատմամբ ՀՀ մաքսային օրենսգրքի 203-րդ հոդվածի հատկանիշներով կազմվել է մաքսային կանոնների խախտման վերաբերյալ արձանագրություն, իսկ վերոնշյալ ապրանքները վերցվել և ի պահ է հանձնվել ՀՀ Ուրբան Լոջիստիկ Սերվիսիս>> ՓԲ ընկերության ժամանակավոր պահպանման պահեստ:

2020 թվականի օգոստոսի 02-ին ՀՀ ՊԵԿ Արևելյան մաքսատուն-վարչության Բագրատաշենի մաքսային կետ-բաժնում տված բացատրությամբ Անդրանիկ Սվարյանը հայտնել է, որ հեռախոսներն իրեն փոխանցվել է ՀՀ տեղափոխելու համար:

2020 թվականի սեպտեմբերի 15-ին ՀՀ ՊԵԿ իրավաբանական վարչությունում Անդրանիկ Սվարյանը հայտնել է, որ ընդունում է իր կողմից կատարված խախտումը և չի ցանկանում վիճարկել այն:

Հեռախոսների շուկայական արժեքը պարզելու համար, 2020 թվականի օգոստոսի 21-ին կայացվել է «Ապրանքագիտական փորձաքննություն նշանակելու մասին» որոշում, որի կատարումը հանձնարարվել է ՀՀ «Փորձագիտական կենտրոն» պետական ոչ առևտրային կազմակերպության փորձագետներին:

ՀՀ «Փորձագիտական կենտրոն» ՊՈԱԿ փորձագետի 23.09.2020թ. թիվ 21812010 եզրակացության համաձայն՝ փորձաքննությանը ներկայացված հեռախոսների շուկայական արժեքը 2020 թվականի օգոստոսի 02-ի դրությամբ կազմել է 1760000 ՀՀ դրամ:

Պարզելու համար, թե որքան է կազմել Անդրանիկ Սվարյանի կողմից առանց հայտարարագրման ՀՀ մաքսային սահմանով տեղափոխված հեռախոսների մաքսային արժեքը և առաջացել է ոչ սակագնային կարգավորման միջոցների չկիրառում, թե ոչ, վարչական վարույթի ընթացքում 25.09.2020թ. հարցում է կատարվել ՀՀ ՊԵԿ Մաքսային հսկողության վարչություն, որտեղից ստացված 26.09.2020թ. գրության համաձայն ՀՀ «Փորձագիտական կենտրոն» ՊՈԱԿ փորձագետի 23.09.2020թ. թիվ 21812010 եզրակացության հետազոտության բաժնում նկարագրված հեռախոսների մաքսային արժեքը 02.08.2020թ. դրությամբ, ֆիզիկական անձի կողմից ոչ ԵԱՏՄ անդամ երկրից ներմուծելու դեպքում կկազմի 1466608 ՀՀ դրամ, իսկ մաքսային վճարները՝ 293322 ՀՀ դրամ (ԱԱՀ): Միաժամանակ հայտնել են, որ համաձայն ԵՏՀ կոլեգիայի 21.04.2015թ. թիվ 30 որոշմամբ սահմանված սահմանափակումների ենթակա ապրանքների միասնական ցանկի ոչ ԵԱՏՄ անդամ երկրից նշված ապրանքները ներմուծելու դեպքում ոչ սակագնային միջոցների կիրառում առաջանում է:

ԵԱՏՄ մաքսային օրենսգրքի 104-րդ հոդվածի համաձայն՝ ապրանքները ենթակա են մաքսային հայտարարագրման դրանք մաքսային ընթացակարգով ձևակերպելու կամ սույն

Օրենսգրքին համապատասխան սահմանված այլ դեպքերում: Մաքսային հայտարարագրումն իրականացվում է հայտարարատուի կամ մաքսային ներկայացուցչի կողմից, եթե սույն օրենսգրքով այլ բան սահմանված չէ: Մաքսային հայտարարագրումն իրականացվում է գրավոր և (կամ) էլեկտրոնային եղանակով:

ԵԱՏՄ մաքսային օրենսգրքի 83-րդ հոդվածի համաձայն՝ որպես մաքսային ընթացակարգերով ձևակերպվող ապրանքների հայտարարատու կարող է հանդես գալ անդամ պետության անձը, որն ունի ապրանքների տիրապետման, օգտագործման և (կամ) տնօրինման իրավունք, եթե ապրանքները Միության մաքսային սահմանով տեղափոխվում են այն գործարքի շրջանակներից դուրս, որի կողմերից մեկն օտարերկրյա անձ է:

ԵԱՏՄ մաքսային օրենսգրքի 260-րդ հոդվածի 1-րդ մասի 2-րդ ենթակետի համաձայն՝ մաքսային հայտարարագրման ենթակա են ցանկացած եղանակով միության մաքսային սահմանով տեղափոխվող անձնական օգտագործման այն ապրանքները, բացառությամբ անձնական օգտագործման տրանսպորտային միջոցների, որոնց հետ կապված, պահպանվում են արգելքներն ու սահմանափակումները:

ԵԱՏՄ մաքսային օրենսգրքի 2-րդ հոդվածի 10-րդ կետի համաձայն՝ «արգելքներն ու սահմանափակումներն»՝ Միության մաքսային սահմանով տեղափոխվող ապրանքների նկատմամբ կիրառվող ոչ սակագնային կարգավորման միջոցներ են:

«Եվրասիական տնտեսական միության մասին» պայմանագրի 46-րդ հոդվածով սահմանված են ոչ սակագնային կարգավորման միջոցները, այն է. «Երրորդ երկրների հետ առևտրում Միության կողմից ընդունվում են ոչ սակագնային կարգավորման հետևյալ միջոցները՝ 1) ապրանքների ներմուծման և (կամ) արտահանման արգելք, 2) ապրանքների ներմուծման և (կամ) արտահանման քանակական սահմանափակումներ, 3) ապրանքների ներմուծման և (կամ) արտահանման բացառիկ իրավունք, 4) ապրանքների ներմուծման և (կամ) արտահանման ավտոմատ լիցենզավորում (հսկում), 5) ապրանքների ներմուծման և (կամ) արտահանման թույլատրական կարգ»:

ԵԱՏՄ մաքսային օրենսգրքի 260-րդ հոդվածի 14-րդ կետի 1-ին մասի համաձայն՝ որպես անձնական օգտագործման ապրանքների հայտարարատուներ կարող են հանդես գալ 16 տարին լրացած՝ անդամ պետությունների ֆիզիկական անձինք կամ օտարերկրյա ֆիզիկական անձինք, որոնք Միության մաքսային սահմանը հատելու պահին Միության մաքսային սահմանով ուղեկցվող ուղեբեռում տեղափոխվող անձնական օգտագործման ապրանքների նկատմամբ ունեն տիրապետման, օգտագործման եւ (կամ) տնօրինման իրավունք: Օրենսգրքի 84-րդ հոդվածի համաձայն՝ հայտարարատուն պարտավոր է կատարել ապրանքների մաքսային հայտարարագրում, սույն Օրենսգրքով նախատեսված դեպքերում մաքսային մարմին ներկայացնել մաքսային հայտարարագրում ներկայացված տեղեկությունները հաստատող փաստաթղթեր, ներկայացնել հայտարարագրվող ապրանքները՝ սույն Օրենսգրքով նախատեսված դեպքերում կամ մաքսային մարմնի պահանջով, վճարել մաքսային վճարները, հատուկ, հակազնազցման, փոխհատուցման տուրքերը և (կամ) ապահովել դրանց վճարման պարտավորության կատարումը՝ սույն Օրենսգրքին համապատասխան: Նույն հոդված 3-րդ մասի համաձայն՝ հայտարարատուն, անդամ պետությունների օրենսդրությանը համապատասխան, պատասխանատվություն է կրում սույն հոդվածի 2-րդ կետով նախատեսված պարտականությունները չկատարելու, մաքսային հայտարարագրում ոչ հավաստի տեղեկություններ ներկայացնելու, ինչպես նաև մաքսային ներկայացուցչին անվավեր, այդ թվում՝ կեղծ և (կամ) ակնհայտ ոչ հավաստի (սուտ) տեղեկություններ պարունակող փաստաթղթեր ներկայացնելու համար:

ՀՀ մաքսային օրենսգրքի 189-րդ հոդվածի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

ՀՀ մաքսային օրենսգրքի 203-րդ հոդվածի 1-ին մասի 3-րդ պարբերության համաձայն՝ Հայաստանի Հանրապետության մաքսային սահմանով տեղափոխվող ապրանքները և տրանսպորտային միջոցները չհայտարարագրելը կամ ոչ իրենց անվանմամբ հայտարարագրելը կամ հայտարարագրման ժամանակ ոչ ճշգրիտ տեղեկություններ նշելը, որն առաջացնում է ոչ սակագնային կարգավորման միջոցների չկիրառում՝ հանցագործության հատկանիշների բացակայության դեպքում առաջացնում է տուգանքի նշանակում՝ այդ ապրանքների և տրանսպորտային միջոցների մաքսային արժեքի չափով:

ՀՀ մաքսային օրենսգրքի 219-րդ հոդվածի համաձայն՝ մաքսային կանոնների խախտման վերաբերյալ գործը քննվում է վարչական պատասխանատվության ենթարկվող անձի մասնակցությամբ: Գործը կարող է քննվել նաև տվյալ անձի բացակայության դեպքում, եթե քննության տեղի ու ժամանակի մասին սահմանված կարգով նրան տեղյակ է պահվել, սակայն վերջինիս կողմից որևէ միջնորդություն չի հարուցվել, կամ եթե անձը բացակայում է, և հայտնի չէ նրա գտնվելու վայրը, կամ եթե նա գտնվում է Հայաստանի Հանրապետության սահմաններից դուրս:

Անդրանիկ Սվարյանը 2020 թվականի սեպտեմբերի 23-ին հրավիրվել է ՀՀ ՊԵԿ իրավաբանական վարչություն՝ իր նկատմամբ ՀՀ մաքսային օրենսգրքի 203-րդ հոդվածի հատկանիշներով սկսված վարչական գործի քննությանը մասնակցելու համար և միաժամանակ նախազգուշացվել, որ համաձայն ՀՀ մաքսային օրենսգրքի 219-րդ հոդվածի՝ չներկայանալու դեպքում վարչական գործի քննությունը կիրականացվի առանց իր մասնակցության, սակայն վերջինս չի ներկայացել:

Այսպիսով, նյութերով պարզվել է, որ 2020 թվականի հուլիսի 02-ին Անդրանիկ Սվարյանը առանց հայտարարագրման, RENAULT մակնիշի 545AP61 հաշվառման համարանիշի բեռնատար ավտոմեքենայով ՀՀ մաքսային սահմանով տեղափոխել է 1466608 ՀՀ դրամ մաքսային արժեքով 4 հատ IPHONE մոդելի բջջային հեռախոսներ, այսինքն՝ Անդրանիկ Սվարյանը թույլ է տվել ՀՀ մաքսային օրենսգրքի 203-րդ հոդվածի 1-ին մասի 3-րդ պարբերությամբ նախատեսված մաքսային կանոնների խախտում, ինչը հիմնավորվում է մաքսային կանոնների խախտման վերաբերյալ կազմված արձանագրությամբ, Անդրանիկ Սվարյանի բացատրությամբ, ՀՀ «Փորձագիտական կենտրոն» պետական ոչ առևտրային կազմակերպության փորձագետի 23.09.2020թ. թիվ 21812010 եզրակացությամբ և ՀՀ ՊԵԿ մաքսային հսկողության վարչության 26.09.2020թ. գրությամբ:

Վերոգրյալի հիման վրա և ղեկավարվելով ՎԻՎ օրենսգրքի 281-րդ հոդվածով, ՀՀ մաքսային օրենսգրքի 203-րդ հոդվածի 1-ին մասի 3-րդ պարբերությամբ, 206 և 221-րդ և 224-րդ հոդվածներով,

## Ո Ր Ո Շ Ե Ց Ի՝

1. Անդրանիկ Սվարյանին (ծնված՝ 29.10.1968թ., ՀՀ քաղաքացի, բնակվող՝ ՀՀ, Լոռու մարզ, գ. Ծաղկաբեր, անձնագրի համարը՝ BA2855393) ճանաչել զանցառու ՀՀ մաքսային օրենսգրքի 203-րդ հոդվածի 1-ին մասի 3-րդ պարբերությամբ և նրան տուգանել առանց հայտարարագրման ՀՀ մաքսային սահմանով տեղափոխված հեռախոսների մաքսային արժեքի չափով՝ 1466608 ՀՀ դրամ:

/900005024055 (կող-19) հաշվեհամարին/

2. Վերցված ապրանքները կարող են վերադարձվել մաքսային ձևակերպումները կատարելուց, տուգանքի վճարումից, մաքսային վճարների և պարտավորությունների կատարումից հետո՝ մեկ աշխատանքային օրվա ընթացքում:

3. ԵԱՏՄ Մաքսային օրենսգրքի 98-րդ հոդվածի 4-րդ մասի համաձայն որոշումն ուժի մեջ մտնելու օրվան հաջորդող օրվանից ոչ ուշ, քան 10 օրացուցային օրվա ընթացքում վերցված ապրանքները պետք է հանձնվեն ժամանակավոր պահպանման:

4. Որոշման մասին հայտնել Անդրանիկ Սվարյանին՝ պարզաբանելով, որ ՀՀ մաքսային օրենսգրքի 221-րդ հոդվածի համաձայն՝ որոշումն ուժի մեջ է մտնում կայացման պահից և Վարչարարության հիմունքների և վարչական վարույթի մասին ՀՀ օրենքի 71 հոդվածի համաձայն՝ 2 ամսվա ընթացքում կարող է բողոքարկվել վերադաս մաքսային մարմին կամ ՀՀ վարչական դատավարության օրենսգրքի 72-րդ հոդվածի 1-ին մասին 1-ին կետի համաձայն՝ 2 ամսվա ընթացքում ՀՀ վարչական դատարան:

**ԻՐԱՎԱԲԱՆԱԿԱՆ  
ՎԱՐՉՈՒԹՅԱՆ ՊԵՏ**



**ԱՐՄԱՆ ՄՆԱՑԱԿԱՆՅԱՆ**